

醫述卷五 雜證匯參

新安杏軒程文園觀泉輯

門人

李鳳翔千仞校
朱一爵廷一

傷風

經義

風者。百病之長也。今風寒客於人。使人毫毛畢直。皮膚閉而爲熱。當是之時。可汗而發也。○邪風之至。疾如風雨。○虛邪賊風。避之有時。○傷於風者。上先受之。素問

哲言

風爲百病之長。蓋六氣之中。惟風能全兼五氣。如兼寒



醫述卷五

雜證匯參目錄

傷風

暑

溼

燥

溫熱

疫

斑疹沙痞



醫述卷五 雜證匯參

新安杏軒程文園觀泉輯

門人

李鳳翔千仞校
朱一爵廷一

傷風

經義

風者。百病之長也。今風寒客於人。使人毫毛畢直。皮膚閉而爲熱。當是之時。可汗而發也。○邪風之至。疾如風雨。○虛邪賊風。避之有時。○傷於風者。上先受之。素問

哲言

風爲百病之長。蓋六氣之中。惟風能全兼五氣。如兼寒



曰風寒。兼暑曰暑風。兼溼曰風溼。兼燥曰風燥。兼火曰風火。蓋因風能鼓盪此五氣而傷人。其餘五氣則不能互相全兼。如寒不能兼暑與火。暑亦不兼寒。溼不兼燥。燥不兼溼。火不兼寒。由此觀之。病之因乎風而起者。自多也。然風能兼寒。寒不兼風。如冬寒之時。卽密室之中。人若裸臥。必犯傷寒之病。此本無風氣侵入。乃但傷於寒而不兼風者也。風能兼寒者。因風中本有寒氣。蓋巽爲風。風之性本寒。卽巽卦之初爻屬陰是也。因風能流動鼓盪。其用屬陽。是合乎巽之二爻。三爻皆陽爻也。如溽暑之時。若使數人扇一人。其人必致汗孔閉。頭痛惡寒。骨節疼。傷寒之病作矣。斯時天地間固無一些寒氣。

實因所扇之風。風中卻有寒氣。故令人受之。寒疾頓作。此乃因傷風而兼傷寒者也。故有但傷寒而不傷風之

證。亦有因傷風而致兼傷寒之證。又有但傷風而不傷寒之證。有因傷風而或兼風溫風溼風燥風火等證。更有暑溼燥火四氣。各自致傷。而絕不兼風之證。柯韻伯所註傷寒云。傷風之重者。卽屬傷寒。亦有無汗脈緊骨節疼諸證。此書所以能獨開仲景生面也。至仲景所著傷寒書。本以寒爲主。因風能兼寒。故以風陪說。互相發明耳。學者看書。不可不知此理。若夫臟腑一切內外諸風。各有見證。具載內經。尤當詳考。臨證指南

傷風之病。本由外感。但邪甚而深者。徧傳經絡。卽爲傷



寒邪輕而淺者。止犯皮毛。卽爲傷風。皮毛爲肺之合。上通於鼻。故在外則爲鼻塞聲重。或爲頭痛寒熱。在內則爲咳嗽。甚則爲痰爲喘。有寒勝而受風者。必無汗。熱勝而受風者。必多汗。强者數日邪散則愈。弱者邪不易解。延綿不除。蓋風邪傷人。必在肩後頸根大杼風門肺俞之間。由茲達肺最近。凡體質薄弱。邪尤易犯。但知晝夜密護其處。勿使受涼。則可免患。張景岳

更衣脫帽。沐浴當風。皮毛之間。卒然受邪。內舍於肺者。外因也。衣被過厚。上焦壅熱。內熱生風。似乎傷風者。內因也。肺家素有痰熱。復受風邪束縛。內火不得舒洩。謂之寒暄。此表裏兩因之實證也。有平昔元氣虛弱。表疏

腠鬆。略有不謹。卽顯風證者。此表裏兩因之虛證也。風循經絡。亦有六經傳變。初起頭疼身熱與傷寒同。但傷風必鼻塞流涕。且多惡風。居暖室中。則坦然自如。傷寒惡寒。雖近烈火。仍復怕寒。傷風在表有汗。而手足微煩。傷寒在表無汗。而手足微冷。傷風在裏。肺熱而皮膚發疹。傷寒在裏。胃熱而肌肉發斑。皆各異也。證治彙補

傷風一證。諸家皆與感冒四氣併中風條混治。惟陳無擇別立傷風一門。且依傷寒以太陽爲始。分註六經。可謂詳晰。但風本外邪。諸方例用發表。然受病之源。亦有不同。若表虛受風。專用發表。必致汗多亡陽。若內挾痰熱。宜內外交治。亦不可專於解表。或曰。此云表虛。與傷



寒中風表虛同歟。曰。不同也。彼以太陽中風。而於有汗無汗分虛實。實者加麻黃。虛者加葛根。俱解表也。此云表虛者。當固衛氣而散風邪者也。劉宗厚

邪之所湊。其氣必虛。故治風者。不患無以驅之。而患無以禦之。不畏風之不去。而畏風之復來。何則。發散太過。元府不閉故也。昧者不知托裏固表之法。徧試風藥以驅之。去者自去。來者自來。邪氣留連。終無解期矣。柯韻伯傷風雖小病。然諺云不愈卽成勞。蓋由乎金水二臟不足。陽氣不能衛外也。經曰。傷於風者。上先受之。故必頭痛。仲景云。陽浮者熱自發。陰弱者汗自出。故必發熱自汗。蓋風者天之陽。衛者人之陽。風傷於衛。以類相從也。

治法當審內因外因爲的。外因有餘。秋冬辛溫。春夏辛涼。解肌表而從汗散。內因不足。固其衛氣。兼解風邪。要知邪之所湊。其正必虛。倘徒事驅逐。則已受之邪。從此而去。未來之邪。何時而已耶。若既表散之後。病仍如故。此血氣不充。營衛失和。當調和營衛爲主。勿謂小病輕忽。藥餌誤投。由淺入深。侵淫臟腑。變成勞瘵。莫可治療。

馮氏錦囊

脈候

左寸關浮弦有力者。傷風也。右寸關洪滑有力者。傷暖也。右寸關濡弱無力者。兼虛也。證治彙補

選案

石開曉病傷風咳嗽。未嘗發熱。自覺急迫欲死。呼吸不續。面赤躁擾。脈大而空。謂曰。此證全似傷寒戴陽證。何傷風小恙亦有之。急用參附等藥溫補下元。收回陽氣。不然。子丑時大汗脫陽而死矣。渠不以爲然。及日落。陽不用事。慌亂不支。汗出如雨。忙服前藥稍定。再劑汗止神安。嗽俱不作。詢其所由。云服麻黃藥四劑。遂爾躁急欲死。然後知傷風亦有戴陽證。與傷寒無別。因其人平素下虛。是以真陽易於上越耳。喻嘉言

暑

經義

氣虛身熱。得之傷暑。○後夏至日爲病暑。暑當與汗皆出勿止。○因於暑汗。煩則喘渴。靜則多言。素問

哲言

太陽中暍。發熱惡寒。身重疼痛。其脈弦細芤遲。小便已。灑灑然毛聳。手足逆冷。小有勞。身卽熱。口開前板齒燥。若發其汗。則惡寒甚。加溫鍼。則發熱甚。數下之則淋甚。○太陽中暍者。熱是也。汗出惡寒。身熱而渴。白虎加人參湯主之。○太陽中暍。身熱疼重。而脈微弱。此以夏月



傷冷水。水行皮中。所致也。一物瓜蒂散主之。金匱

人知冬不藏精者致病。不知夏不藏精者更甚焉。嘗見怯弱之人。而當酷暑。每云氣欲悶絕。可知中暍而死者。直因氣之悶絕也。夫人值搖精。恆多氣促。與當暑之氣悶不甚相遠。經曰熱傷氣。又曰壯火食氣。余故曰夏令之炎威。甚於冬令之寒。苟不藏精。壯者至秋發爲伏暑。怯者卽中暍而死。吳醫彙講

傷暑與傷寒。身皆發熱。不可不辨明施治。蓋寒傷形。暑傷氣。傷寒則惡寒而脈浮緊。傷暑則不惡寒而脈虛。經曰。脈盛身寒。得之傷寒。脈虛身熱。得之傷暑。赤水玄珠

暑證變幻無常。彼暴中之激烈。扁鵲不及攬指而投咀。

久伏之毒深。長桑莫能隔膚而見臟。卽尋常之感。亦難於知覺。非若傷寒之有定期。定證可據可療者。不拘表裏。不以漸次。不論臟腑。冒暑從口鼻入。直入心包。先煩悶。後身熱。入肝則眩暈頑麻。入脾則昏睡不覺。入肺則喘咳痿痺。入腎則消渴。中暑歸心。神昏卒倒。暑傷肉分。周身煩躁。或如鍼刺。或有赤腫。暑入腸胃。腹痛霍亂吐瀉。暑伏三焦。變出寒熱不定。膨脹中滿。瘡痢下血。治法清內火爲主。解表兼之。寒之中人乘其虛。暑則虛實並。中。而實者更劇。蓋強盛之人。內有伏火。加之外火相合。故焦灼爲甚。經虛處寒棲之。經實處暑棲之。寒凌其弱。暑親其類也。藜藿常被寒。膏粱獨能禦。暑則不問膏粱



藜藿。咸能侮之。雖廣廈累冰。輕羅紈綺。一犯其烈焰。詎能卻之乎。是以知暑氣之毒甚於寒。乃古人專以寒爲殺厲之氣。而不及暑者。何也。試觀傷寒至七八日方危。暑病則有危在二三日間。甚至朝發暮殆。尤有頃刻忽作。拯救不及者。如暑風乾霍亂之類是也。且暑證多岐。中熱中暍。中內中外。爲厥爲風。爲顛癇。卽發則泄瀉霍亂。積久後發。則瘡痢瘡瘍。種種病名。皆暑爲厲。則殺厲之氣。視寒豈少哉。溫熱暑疫全書

暑有八證。脈虛。自汗。身熱。背寒。面垢。煩渴。手足微冷。體重是也。○陽暑者。因暑受熱也。在仲景謂之中暍。凡盛暑烈日之時。或於長途。或於田野。不辭勞苦。以致熱邪

傷陰。而病爲頭疼。煩熱。大渴。大汗。脈浮。氣喘。或無氣以動等證。此以暑月受熱。故名陽暑。治宜察氣之虛實。火之微甚。或補或清。與陰暑之治不同。○陰暑者。因暑受寒也。凡人之畏暑貪涼。或於深堂大廈。或於風地樹陰。或乍熱乍寒之時。不謹衣被。以致寒邪襲於肌表。而病爲發熱頭痛。無汗惡寒。肢體痠痛等證。此名陰暑。卽傷寒也。治宜溫散。又有不慎口腹。過食生冷。以致寒涼傷臟。而爲嘔吐瀉利腹痛等證。此寒邪在內。亦陰暑之屬。治宜溫中。○凡中暑熱者。人皆知爲陽證。而不知陽中有陰也。蓋外中暑熱。而內亦熱者。方是陽證。若內本無熱。而因熱傷氣。但氣虛於中者。便有伏陰之象。故凡治



暑熱之證。最當辨其陰陽虛實。若脈虛無力。證見惡寒嘔惡。腹痛泄瀉。不喜涼飲。息短氣促之類。皆陽中之陰證也。治當專顧元氣。惟獨參湯最妙。若兼微嘔惡寒者。宜加炮薑。甚者養中煎。理中湯。理陰煎。隨宜用之。若虛寒之甚。則舍時從證。桂附皆所必用。勿因暑熱之名。而執用寒涼。再伐陽氣。○夏月盛暑之時。必令身有微汗。此養身之道也。若必使快然無汗。則陰勝於陽。多致疾矣。觀之經曰。暑當與汗皆出。勿止。是言暑汗之勿宜止也。又曰。夏暑汗不出者。秋成風癘。是言暑汗不出之爲病也。此夏月之汗宜否。蓋可知矣。張景岳

暑爲陽邪。故蒸熱。暑必兼溼。故自汗。暑邪干心。則煩。干

肺則渴。干脾則吐利。上蒸於頭則重而痛。暑傷氣故倦怠。夏至日後病熱爲暑。暑者。相火行令也。人感之自口鼻而入。傷心包絡之經。暑喜傷心故也。其脈虛。或浮大而散。或弦細芤遲。蓋熱傷氣。則氣消而脈虛弱。治法宜清心。利小便。補真氣爲要。熱渴者並宜滋水。蓋渴則陽氣內伐。熱舍於腎。令人骨乏無力。總由火盛則金病。水衰腎與膀胱俱竭。當急救之。補肺氣。以滋水之上源。生脈散既扶元氣。復保肺生津耳。馮氏錦囊

中暑中暈。脈虛脈沉。無汗有汗。發熱不熱。作渴不渴。或瀉不瀉。飲寒飲熱。須辨其陰陽虛實。不可泛投寒涼。蓋夏月伏陰在內。古人用附子大順散溫補陽氣。厥有旨

